

Bärgkristall

1. Gwachse uf de herte Steine, g'formt i tusige vo Jahr,
putzt und geschliffe chöntisch meine s'wer das süberscht Glas sogar.
Funkle tuet er i der Sunne, s'chund mer wie nes Wunder vor.
Gids ächt tief im Bode unne us Kristall es Himmelstor?
2. Grobi Zingge fini Spitze, luter wie ne klare See,
strahle, glänze, funkle, blitze, magsch nid gnueg das Spieli gseh!
Geschter isch us dunkler Erde der Kristall a d'Sunne cho.
S'isch es Uferstah, es Würde. Lueg nur rächt: Wirsch still und froh!
3. Gäbs nid au i üsem Läbe tusig dertig glänzig Stei?
Menge suecht die Schätz vergäbe, läuft verby a Hus und Hei.
Liebi, Fründschaft, schöni Stunde und die chline Freude all.
Suech! Hesch gly es Stückli g'funde. Häb dra Freud wie am Kristall!